



Fin 2011 è prevì da reducir ils camiuns tras las Alps sin in milliun.

KY

15 onns iniziativa da las Alps

■ (anr/ld) 15 onns suenter ch'il pievel ha acceptà l'iniziativa da las Alps fan ils exponentis ina bilantscha pauc cuntentavla. Il

president da l'iniziativa da las Alps, cuss. naz. *Fabio Pedrina* (pss/TI), è bain satisfatg ch'il parlament ha confermà la finamira da reducir il dumber da camiuns sin via tras las Alps sin 650 000. El ha dentant qualifitgà la spustada dal termin da 2009 sin l'onn 2019 sco in act da sabotascha envers la voluntad dal suveran. Il cussegl federal dovria 25 onns per realisar la voluntad dal pievel. Necessari saja uss ch'il cussegl federal preparia senza retard contracts cun l'ester per ina bursa da transit per camiuns sin via. Pli baud ch'ina bursa da transit vegnia realisada, pli bleras subvenziuns possian vegnir spargnadas, ha punctuà Pedrina.

A chaschun da la conferenza da pressa dad ier a Berna ha *Alf Arnold*, il gestiunari da l'iniziativa da las Alps, fatg attent che la

lescha prevesia da reducir il dumber actual da 1,3 milliuns camiuns sin in milliun fin l'onn 2011. Arnold propona da subvenziunar pli ferm il transit da vitgira sin la viafier e da dosar pli rigurus il traffic da camiuns tras il Gottard. Plinavant duai vegnir decretà in scumond total per camiuns cun emissius da substanzas nuschainvas sco Euro-0 ed Euro-1. Arnold pretenda er in program da conjuntura per dismetter stretgas sin la lingia dal Gottard. Tut quellas mesiras sajan necessarias per realisar la reducziun dal dumber da camiuns sin via, prendida en mira fin l'onn 2011. Arnold ha critigà il cussegl federal che saja stà memia ditg inactiv areguard la dumonda dal transferiment.

Ils 9/10 da matg 2009 vegn festivà a Flüelen il giubileum da 15 onns iniziativa da las Alps e 20 onns la commemoraziun da la fundaziun da l'uniun. Oratur festiv è *Moritz Leuenberger*.